



UNIVERSIDADE DA CORUÑA

REGULAMENTO DA COMISIÓN DE ESTUDOS DE MESTRADO UNIVERSITARIO E DOUTORAMENTO

O Real decreto 1393/2007 establece a organización dos estudos universitarios en tres niveis: grao, mestrado e doutoramento. Así mesmo, a fase formativa dos estudos de doutoramento queda establecida, salvo casos excepcionais, ligada a un ou varios mestrados.

Por iso, cómpre a creación dunha comisión que abranga estes dous niveis, onde se inclúe una subcomisión específica de doutoramento para procedementos específicos deste nivel.

CAPÍTULO 1. COMPOSICIÓN E FUNCIONS

Artigo 1

1. A Comisión de Estudos de Mestrado Universitario e Doutoramento da Universidade da Coruña estará composta por:

- O/a vicerreitor/a con competencias en Organización Académica, que a presidirá. En caso de ausencia será substituído/a polo vicerreitor membro nato que designe.
- Os/as vicerreitores/as con competencias en Calidade, Profesorado e Investigación, como membros natos.
- Dous membros do PDI da rama do coñecemento de Artes e Humanidades, dous da rama de Ciencias, dous da rama de Ciencias da Saúde, tres da rama de Ciencias Sociais e Xurídicas e tres da rama de Enxeñaría e Arquitectura, que deberán todos eles ser profesorado permanente doutor. Actuará como secretario/a o membro do PDI designado polo/a presidente/a.
- Un membro do PAS
- Dous estudantes de mestrado ou doutoramento

2. Os/as representantes do PDI, do PAS e do estudantado serán propostos e elixidos en sesión de Consello de Goberno de entre os membros dos respectivos sectores da comunidade universitaria por un período de catro anos, agás o estudantado que o será por dous anos, e será posible a reelección por unha soa vez.

3. Os representantes do PDI renovaranse cada catro anos por metades. Os representantes do estudantado renovaranse cada dous anos

Artigo 2

Son funcións da Comisión de Estudos de Mestrado Universitario e Doutoramento:

1. Elaborar e, no seu caso, modificar o regulamento de réxime interno da propia comisión.
2. Elaborar e, no seu caso, modificar a normativa de elaboración dos planos de estudo dos mestrados e doutoramentos.
3. Propoñerlle ao Consello de Goberno da UDC os mestrados e doutoramentos, por



UNIVERSIDADE DA CORUÑA

- iniciativa das xuntas de centro, departamentos ou institutos segundo proceda en cada caso, e informar o Consello de Goberno das modificacións sobre os xa existentes, para a súa aprobación.
4. Velar pola existencia dos recursos humanos e materiais necesarios para a implantación dun mestrado ou doutoramento e, no seu caso, informar sobre as necesidades existentes
 5. Analizar a calidade académica de cada proposta de mestrado ou doutoramento, para o que deberá considerar a adecuación do historial docente e investigador das persoas responsables da docencia, a coherencia do programa, a optatividade máxima e a interdisciplinabilidade con que se formula.
 6. No caso de programas conxuntos con outras universidades, a Comisión velará polo cumprimento da normativa estatal e autonómica aplicable.
 7. Propoñer, se for necesario, no caso de mestrados propostos conxuntamente por varios centros a súa adscrición a un deles.
 8. Determinar o número mínimo de estudantes para autorizar que se imparta un mestrado ou doutoramento na UDC, de acordo coa normativa autonómica.
 9. Autorizar, a proposta das persoas responsables do programa, a colaboración nun mestrado ou doutoramento de profesionais e de investigadores, que non sexan profesores universitarios.
 10. Autorizar, a proposta das persoas responsables do programa, os acordos de colaboración con outras institucións ou organismos públicos ou privados.
 11. Establecer, a proposta das persoas responsables do programa, os requisitos de admisión específicos e os criterios de valoración de méritos para o acceso a un mestrado ou doutoramento.
 12. Establecer anualmente as datas para a presentación por parte das xuntas de centro, departamento ou instituto das novas implantacións de mestrado ou doutoramento, así como as das modificacións dos xa existentes.
 13. Propoñerlle anualmente ao Consello de Goberno as datas de preinscrición e matrícula nos mestrados ou doutoramentos.
 14. Tomar os acordos necesarios relativos á organización académica dun mestrado ou doutoramento, e resolver os conflitos que puideren xurdir.
 15. Propoñer a modificación da normativa propia de estudos de posgrao oficiais para a súa aprobación polo Consello de Goberno.
 16. Calquera outra competencia que lle atribuír a lexislación vixente e os Estatutos da UDC.

Artigo 3

1. A Comisión actúa en pleno ou nas comisións delegadas establecidas a que se refire o capítulo II deste regulamento. O pleno poderá delegar nestas últimas as competencias que considerar oportunas por razón da materia.
2. A Comisión pode constituír en calquera momento comisións específicas para tratar temas concretos, mais respectará na súa composición a representación dos sectores implicados.



UNIVERSIDADE DA CORUÑA

CAPÍTULO II. NORMAS DE FUNCIONAMENTO EN PLENO OU EN COMISIÓNS

Sección 1ª. Da convocatoria, constitución e funcionamento do pleno da Comisión de Estudos de Mestrado Universitario e Doutoramento

Artigo 4

1. A convocatoria da comisión correspóndelle ao/á vicerreitor/a con competencias en Organización Académica.
2. Para que a convocatoria produza efecto, deberase poñer en coñecemento de todos os membros da comisión mediante unha notificación en que se fará constar a orde do día e mais o día, a hora e o lugar da reunión.
3. As citacións da convocatoria cursaranse coa antelación suficiente para que todos os membros a reciban corenta e oito horas antes da celebración da sesión. A convocatoria será nominal e dirixida ao departamento, centro ou servizo a que pertenza o membro convocado e, no caso dos representantes do estudantado, ao local asignado a eles nos diferentes centros ou, durante os períodos non-lectivos, aos seus domicilios particulares. En casos de convocatoria urxente dunha sesión, quer ordinaria, quer extraordinaria, deberá respectarse un prazo mínimo de 24 horas. A información sobre os temas que figuran na orde do día poderase enviar por correo electrónico se a maioría absoluta da comisión está de acordo.

Artigo 5

1. As sesións do pleno da comisión poden ser ordinarias ou extraordinarias. As sesións ordinarias teranse que realizar polo menos unha vez cada cuadrimestre.
2. As sesións extraordinarias, en que se tratará un só tema ou varios temas de natureza complementaria, realizaranse por iniciativa do/a presidente/a ou dun terzo dos membros da comisión. Neste caso a sesión terá lugar no prazo máximo de tres días hábiles despois da data de presentación da solicitude no Rexistro Xeral.

Artigo 6

1. A orde do día será elaborada polo/a presidente/a.
2. Na orde do día figurarán inescusablemente os puntos de aprobación da acta da sesión anterior, e de rogos e preguntas, agás que a sesión da comisión sexa extraordinaria.
3. Deberán incluírse na orde do día os puntos que previamente solicitase por escrito unha cuarta parte dos membros da comisión.

Artigo 7



UNIVERSIDADE DA CORUÑA

Para a válida constitución da Comisión, para efectos da celebración das sesións, deliberacións e toma de acordos, requirirase a presenza do/a presidente/a e do/a secretario/a ou no seu caso, de quen os/as substitúa, e da metade, ao menos, dos seus membros. De non se alcanzar o dito quórum, poderá constituírse en segunda convocatoria coa presenza da terceira parte dos seus membros, e en todo caso, a do/a presidente/a e do/a secretario/a ou, no seu caso, de quen os/as substitúa.

Artigo 8

1. Os acordos adoptaranse polo maior número de votos a favor dunha proposta. Non se adoptarán acordos válidos se no momento da votación non estiver presente un terzo dos membros da comisión.

2. As votacións poden ser por asentimento coa proposta formulada, públicas a man alzada, e secretas, cando así o solicitaren catro membros da comisión. En todo caso, serán secretas cando afectaren a persoas concretas e o solicitar calquera membro do consello.

Artigo 9

1. Ningún membro pode delegar as súas funcións, salvo o/a presidente/a, nin ser substituído nas sesións da comisión.

2. Non se admitirá a delegación do voto nin o voto anticipado dos membros da comisión.

Sección 2ª. Das comisións delegadas da Comisión de Estudos de Mestrado Universitario e Doutoramento

Artigo 10

1. Sen prexuízo das comisións específicas creadas pola comisión, na forma que determinar, para tratar temas concretos, crease como comisión delegada estable da Comisión de Estudos de Mestrado Universitario e Doutoramento a Comisión de Doutoramento, que estará integrada por:

- o/a vicerreitor/a con competencias en Investigación
- Cinco membros representantes do PDI do pleno da Comisión de Estudos de Mestrado Universitario e Doutoramento, un por cada rama do coñecemento.

A Comisión elixirá entre os seus membros un/unha presidente/a e un/unha secretario.

Así mesmo, elixíranse entre os restantes membros do PDI do pleno da Comisión de Estudos de Mestrado Universitario e Doutoramento, dous suplentes que asistirán a Comisión no caso de ausencia dalgún dos membros titulares.



UNIVERSIDADE DA CORUÑA

2. Entre outras funcións que lle delegue o pleno, a Comisión de Doutoramento deberá elaborar un novo regulamento de estudos de doutoramento adaptado ao Real decreto 1393/2007 ou normativa que o substitúa.

Artigo 11

Son competencias das comisións estables informaren dos asuntos presentados pola Comisión, elaboraren propostas concordantes coa súa natureza, e aquelas outras que lles foren delegadas mediante acordo do pleno da comisións. As súas decisións terán carácter executivo.

Artigo 12

As sesións das comisións delegadas celebraranse en días administrativamente hábiles e serán convocadas polo/a presidente/a, por escrito, polo menos con 48 horas de antelación. En caso de urxencia poderán ser convocadas polo/a presidente/a de forma oral e sen cumprir o prazo de 48 horas, mais respectarase neste caso un prazo mínimo de 24 horas. O/a presidente/a deberá convocar as sesións tras a iniciativa dun terzo dos seus membros.

Artigo 13

As comisións entenderanse validamente constituídas pola maioría absoluta dos seus membros. Os seus informes e propostas serán adoptados por maioría simple.

DISPOSICIÓN TRANSITORIA

En tanto estean en vigor os programas de doutoramento regulados polo Real decreto 778/1998, a Comisión de Doutoramento manterá as funcións contempladas no actual Regulamento de estudos de doutoramento até a completa extinción dos devanditos programas.

DISPOSICIÓN DERROGATORIA

Quedan derrogadas a normativa previa sobre a Comisión de Doutoramento da Universidade da Coruña.

DISPOSICIÓN FINAL

O presente regulamento entrará en vigor ao día seguinte da súa aprobación no Consello de Goberno.